

入菩薩行論 迴向品

寂天菩薩造

01. 造此入行論，所生諸福善，迴向願眾生，悉入菩薩行。
02. 周遍諸方所，身心病苦者，願彼因吾福，得樂如大海。
03. 願彼盡輪迴，終不失安樂，願彼悉皆得，菩薩相續樂。
04. 願諸世間界，所有諸地獄，彼中諸有情，悉獲極樂喜。
05. 願彼寒者暖，亦願菩薩雲，飄降無邊水，清涼炙熱苦。
06. 願彼劍葉林，悉成美樂園，鐵刺樹枝幹，咸成如意枝。
07. 願獄成樂園，飾以鸚鵡雁，悅音美飛禽，芬芳大蓮池。
08. 願煨成寶聚，燒鐵成晶地，怖畏眾台山，成佛無量宮。
09. 岩漿石兵器，悉成散花雨，刀兵相砍殺，化爲互投花。
10. 陷溺似火燃，無灘河眾生，皮肉熔蝕盡，骨露水仙白，願彼因吾福，得獲妙天身，緩降天池中，天女共悠游。
11. 云何此中隼，卒鷲頓生懼，誰有此妙力，除暗生歡喜，思已望空際，喜見金剛手，願以此欣喜，遠罪隨密跡。
12. 願獄有情見，香水拌花雨，自天迅飄降，熄滅熾獄火，安樂意喜足，心思何因緣，思時望空際，喜見聖觀音。
13. 願獄眾有情，歡呼見文殊，友朋速來此，吾上有文殊，五髻光燦燦，已生菩提心，力能滅諸苦，引樂護眾生，令畏盡消除，誰願捨彼去？

14. 彼居悅意宮，天女齊歌頌，著冠百天神，齊禮蓮足前，花雨淋髻頂，悲淚潤慈目。

15. 復願獄有情，以吾善根力，悉見普賢等，無礙菩薩雲，飄降芬芳雨，清涼復安樂，見已彼等眾，由衷生歡喜。
16. 願彼諸傍生，免遭強食畏，復願餓鬼獲，北俱盧人樂。
17. 願聖觀世音，手出甘露乳，飽足餓鬼眾，永浴恒清涼。
18. 願盲見形色，聾者常聞聲，如彼摩耶女，孕婦產無礙。
19. 願裸獲衣裳，饑者得足食，渴者得淨水，妙味諸甘飲。
20. 願貧得財富，苦者享安樂，願彼絕望者，振奮意永固。
21. 願諸病有情，速脫疾病苦，亦願眾生疾，畢竟永不生。
22. 願畏無所懼，縛者得解脫，弱者力強壯，心思互饒益。
23. 願諸營商賈，處處皆安樂，所求一切利，無勞悉成辦。
24. 願諸航行者，成辦意所願，安抵河海岸，親友共歡聚。
25. 願迷郊者，幸遇諸行旅，無有盜虎懼，無倦順利行。
26. 願諸天守護，無路險難處，老弱無怙者，愚癡癩狂徒。
27. 願脫無暇難，具信慈愛慧，食用悉富饒，時時憶宿命。
28. 受用願無盡，猶如虛空藏，無諍亦無害，自在享天年。
29. 願卑寒微士，容光悉煥發，苦行憔悴者，健朗形莊嚴。
30. 願世諸婦女，悉成男子漢，寒門晉顯貴，慢者轉謙遜。
31. 願諸有情眾，因吾諸福德，悉斷一切惡，常樂福善行。

- 32.願不捨覺心，委身菩提行，諸佛恒攝受，盡斷諸魔業。
- 33.願諸有情眾，萬壽永無疆，安樂度時日，不聞死殞名。
- 34.願于諸方所，遍長如意林，充滿佛佛子，所宣妙法音。
- 35.普願十方地，無礫無荆棘，平坦如舒掌，光滑似琉璃。
- 36.願諸菩薩眾，安住聞法眷，各以妙功德，莊嚴佛道場。
- 37.願諸有情眾，相續恒聽聞，鳥樹虛空明，所出妙法音。
- 38.願彼常值佛，以及諸佛子，並以無邊雲，獻供眾生師。
- 39.願天降時雨，五穀悉豐收，仁王如法行，世事皆興隆。
- 40.願藥具速效，咒語成靈驗，空行羅刹等，悉具慈悲心。
- 41.願眾無苦痛，無病未造罪，無懼不遭輕，畢竟無不樂。
- 42.願諸伽藍寺，講誦以興盛，僧伽常和合，僧事悉成辦。
- 43.願欲學比丘，悉住阿蘭若，斷諸散亂已，輕安堪修善。
- 44.願尼得利養，斷諍遠諸害，如是眾僧尼，戒圓無缺憾。
- 45.犯者願生悔，時時懺罪業，壽盡生善趣，不復失禁戒。
- 46.願智受尊崇，化緣皆得足，心續悉清淨，令譽遍十方。
- 47.願離惡趣苦，以及諸艱困，復以勝天身，迅速成正覺。
- 48.願諸有情眾，殷勤供諸佛，依佛無邊福，恒常獲安樂。
- 49.菩薩願如意，成辦眾生利，有情願悉得，怙主慈護念，
- 50.獨覺聲聞眾，願獲涅槃樂。

- 51.我未登地前，願蒙文殊恩，常憶已宿命，出家恒爲僧。
- 52.願吾非飲食，維生充體能，世世願恒得，圓滿寂靜處。
- 53.何世欲相見，或欲問法義，願我無障礙，面見文殊尊。
- 54.爲于十方際，成辦有情利，吾行願得如，文殊圓滿行。
- 55.乃至有虛空，以及眾生住，願吾住世間，盡除眾生苦。
- 56.眾生諸苦痛，願悉報吾身，願因菩薩德，眾生享安樂。
- 57.願除苦良藥，一切安樂源，教法伴利敬，長久住世間。
- 58.禮敬文殊尊，恩生吾善心，亦禮善知識，恩長吾三學。

堪布索達吉譯。

